

Kolumna visokog predstavnika: Iskoristi svoju krajnju moć i odredi sam svoju sudbinu

Piše: Valentin Inzko

Ove godine, Bosna i Hercegovina je bila pogođena najtežim poplavama u zadnjih sto godina, što je uzrokovalo velike patnje ljudi u poplavljenim naseljima.

Nekoliko mjeseci ranije, svjedočili smo velikim demonstracijama i građanskim nemirima kao odgovor na izrazito tešku socijalnu i ekonomsku situaciju u kojoj su se našle mnoge lokalne zajednice i građani. Građani su također ukazali na sve dublji jaz između male vladajuće elite i prosječnog građanina. Sve ovo se dešavalo u kontekstu propalih napora da Bosna i Hercegovina održi korak sa ostatkom regiona na putu ka evroatlantskim integracijama.

Bez obzira na politička opredjeljenja ili mjesto boravka građana s kojima sam razgovarao, teško da sam sreo osobu koja ne dijeli moj stav da mora doći do temeljite promjene u načinu na koji će se voditi politika nakon izbora, odnosno da se moraju odlučno početi rješavati veliki izazovi sa kojima se ova zemlja i njeni građani suočavaju, poput ogromne nezaposlenosti i korupcije.

Dobra vijest je da 12. oktobar pruža priliku da se ova zemlja ponovo pokrene – u pravom smjeru.

Ljudi me često pitaju da li ću koristiti Bonske ovlasti za rješavanje nekog problema ili otklanjanje određenih prepreka u ovoj zemlji. Ja im kažem – 12. oktobra Vi imate priliku da koristite svoje ovlasti kao građani, Vaše Bonske ovlasti, a što je ujedno i Vaše osnovno demokratsko pravo!

Dakle, ključno je pitanje kome ćete dati povjerenje da omogući napredak koji zahtijevate.

O tome neću odlučivati ja, niti međunarodna zajednica, niti neki političari iza zatvorenih vrata.

O tome ćete odlučivati vi.

O budućnosti, odnosno o onome šta će se dešavati u naredne četiri godine, odlučit ćete 12. oktobra samo vi.

Prema tome, šta treba da tražite? Ja vjerujem da trebate tražiti jasne i konkretne odgovore na pitanje kako će se rješavati vaši prioriteti, vaši problemi.

Ako je nezaposlenost vaša osnovna briga, zahtijevajte jasne odgovore o tome kako će se stvarati nova radna mjesta u vašoj lokalnoj zajednici. Kako će se koristiti prilike za rast u vašoj zajednici, ne za to da vladajuća elita postane još bogatija, nego da se stvaraju održiva radna mjesta za nezaposlene. Ako su kandidati i stranke ozbiljni u pogledu naredne četiri godine, onda moraju dati odgovore na takva pitanja.

Stvari se mogu promijeniti 12. oktobra, ali samo ako sami preuzmete odgovornost za vašu budućnost i sudbinu tako što ćete glasati.

Mnogi od vas se žale da nemaju za koga glasati jer im se čini da su sve stranke i kandidati u suštini isti.

Ja ću na to odgovoriti bez okolišanja – to jednostavno nije istina!

Imate veliki izbor i postoje političari koji žele da služe građanima i da povedu zemlju naprijed. Neke stranke su desno od centra, neke su lijevo od centra, neke stranke su bile u vlasti, neke nisu, itd. Naravno, vi ćete uraditi ono što birači rade u svim zemljama – napraviti ćete razliku između političara koji su ispunili svoja obećanja i onih koji nisu.

Ako želimo da se problemi riješe u naredne četiri godine, onda treba izabrati više ljudi koji rješavaju probleme. Predizborna kampanja je pravo vrijeme kada birači treba da ih identifikuju – zahtijevanjem jasnih odgovora od kandidata i političkih partija na pitanje *kako* namjeravaju *vjerodostojno* rješavati probleme koji ih tište.

Ja znam da postoji ogromna doza frustracije. To je potpuno razumljivo kada sagledamo sve poteškoće s kojima se ova zemlja i njen narod nose već toliko vremena, zbog čega će građani odmahnuti rukom i reći: „Ništa se neće promijeniti bez obzira šta ja uradim.”

Ali ipak postoji mogućnost da ova zemlja opet krene naprijed i možete biti sigurni u jedno: ništa se neće promijeniti ako ne glasate!

Vaš glas se računa i to je životno važno, ali samo u slučaju da ga iskoristite. Ako ne budete glasali, neko drugi će odlučiti o vašoj sudbini za vas.

Ne dozvolite da drugi određuju vašu sudbinu i sudbinu vaše djece!

Građani Bosne i Hercegovine će 12. oktobra biti u žiži interesovanja i tada će imati priliku da iskoriste svoje demokratsko pravo i upotrijebe kolektivni autoritet koji daleko nadilazi svaki drugi autoritet u zemlji.

Pozivam vas da zgrabite ovu priliku – glasajte 12. oktobra i odlučite o vlastitoj sudbini. U suprotnom, nemojte sumnjati da će neko drugi odlučiti o vašoj budućnosti.